

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 18
Setyembre 21, 2010
www.philippinerevolution.net

Editorial

Pakilusin ang milyun-milyong mamamayan para isulong ang rebolusyong Pilipino!


Napakapaborable ang mga umiiral na kundisyon para pukawin, organisahin at pakilusin ang milyun-milyong mamamayang Pilipino sa landas ng militanteng pakikibaka at rebolusyonaryong digma. Ang pagluluwal ng malawakang kilusang masa sa buong bansa ang susing rekisito para sa ibayong pagsulong ng digmang bayan tungo sa yugto ng estratehikong pagkapatas sa susunod na limang taon.

Patuloy na lumalala ang mga kundisyong panlipunan sa ilalim ng papet na rehimeng Aquino. Labis ang paghihirap at pagdurusa ng mamamayan sa harap ng malawakang disempleyo, napakababang sahod, matinding pang-aaping pyudal at malapyudal, pagtaas ng mga presyo at pamasahé, pabigat na mga buwis, lansakang korapsyon, kasalatan ng mga serbisyong panlipunan at iba pa.

Sa sidhi ng krisis, mabilis na nalalantad ang kahungkagan ng mga buladas ng rehimeng US-Aquino. Madaling naglaho ang pabalat-bungang maghahatid ito ng pagbabago. Wala pang 100 araw sa pwes-to si Aquino, laganap na ang pagkadismaya, maging sa bahagi ng maraming dating sumuporta o umasa sa kanya.

Itinutuloy lamang ng rehimeng US-Aquino ang mga imperyalistang patakaran sa ekonomya (laluna ang ibayo at mas malawakang denasyunalisasyon at pribatisasyon).

Tampok ang kaso ng Hacienda Luisita at ang tuluyang pagsasaisantabi ng reporma sa lupa. Litaw kaagad ang angilan ng mga paksyon, pagkainutil, korapsyon, at nitong pinakahuli, ang pagkakasangkot ng ilang susing upisyal sa *jueteng*. Patuloy nitong pinahihintulutan ang panghihimasok ng mga dayuhang tropa sa bansa. Patuloy ang mga paglabag sa karapatang-tao, terorismo at matitinding saywar sa pagpapalawig sa Oplan Bantay Laya at pagbubuo ng bagong plano para supilin ang mga paglaban ng mamamayan.



Mga tampok sa isyung ito...

Panukalang badyet:
Diin sa limos PAHINA 3

Tatlong magsasaka,
pinaslang PAHINA 5

Huwad na "pangayaw"
sa Paquibato PAHINA 8

Dapat malawakang pukawin, organisahin at pakilusin ang mamamayan para maipagtanggol at maisulong nila ang kanilang interes sa harap ng tumitinding krisis sa ilalim ng kasalukuyang bulok na gubyrerno at sistema. Ang pagpapakilos ng Partido sa milyun-milyong mamamayan sa malawak na kilusang masa ang pinakamahalagang pampulitikang rekisito para umabante ang digmang bayan.

Linyang makauri at linyang masa ang prinsipyong gabay ng mga rebolusyonaryo at progresibong pwersa sa kanilang pagpapakilos sa mamamayan: lumulubog sila sa masa, inaalang at sinusuri ang kanilang kongkretong kundisyon at mga suliranin, pinupukaw sa mga isyung pinakamalapit sa kanila at kaugnay na mga tampok at matatagal nang problema ng bayan, inorganisa sa iba't ibang angkop na anyo ng mga organisasyon at minomobilisa sa iba't ibang angkop na anyo ng kolektibong pagkilos.

Dapat abutin ang milyun-milyong mamamayan sa kanayunan at kalunsuran, sa mga komunidad, pabrika, eskwelahan, tanggapan, lansangan, at iba pa. Tukuyin ang mga problemang kinakaharap nila at bu-

uin ang kanilang pagkakaisa kapwa sa masinsin at malalawak na saklaw. Pangunahing mga usapin sa kanayunan ang lupa, pagsasamantala ng mga panginoong maylupa at komersyante-usurero, kakulangan ng produksyon, mga sakuna, militarisasyon, kawalan ng suporta ng gubyrerno at mga serbisyong panlipunan. Sa kalunsuran, pangunahing kinakaharap ng mamamayan ang kakulangan ng sahod, kawalan ng empleyo, kundisyon sa pabrika, kontrata sa trabaho, pagtaas ng presyo ng mga saligang pangangailangan, kasalanan at kamahalan ng mga pampublikong serbisyo.

Pukawin, organisahin at pakilusin ang mamamayan upang ipaglaban ang kanilang mga kagyat at matagalang pangangailangan at isulong ang mga estratehikong interes ng bayan para sa rebolusyonaryong pagbabago.

Pasiglahin ang gawaing propaganda, edukasyon at pangkultura. Matalas na suriin ang kinakaharap na mga usapin ng mamamayan sa pamamagitan ng paglalapat dito ng linyang makauri at maka-mamamayan at pampulitikang linya ng pambansa-demokratikong rebolu-




syon. Mata-las na ilantad ang kahungkagan ng umano'y mga repormang ipinamamarali ng rehimen.

Kaagad na pabulaanan ang mga opensibang saywar ng rehimen. Ilantad ang lahat ng klase ng panlilinlang. Puspasang ilantad at batikusin ang mga pasistang krimen ng militar. Ilantad ang kontra-rebolusyonaryong panghihimasok ng US. Ikawing ang mga ito sa pangkalahatang panawagan laban sa imperyalismo, pyudalismo at bukratang kapitalismo at para sa rebolusyonaryong pagbabago.

Tiyakin na nagagamit ang iba't ibang angkop na anyo ng pagpopropaganda at edukasyon hindi lamang para maabot ang pinakamalawak na bilang ng mamamayan kundi para rin epektibo silang mapukaw at mamulat.

Malawakang buuin at pakilusin ang iba't ibang tipo ng mga organisasyong masa upang tugunan ang kanilang mga problema. Buuin ang malalawak na hayag at solidong lihim na organisasyong masa sa batayang antas habang itinatasas ang antas ng saklaw ng mga ito.

Tiyakin ang pagtatatag at konsolidasyon ng mga rebolusyonaryong organisasyong masa at mga rebolusyonaryong bag-as sa iba't ibang sektor at lokalidad, hanggang sa pagbubuo ng mga ganap na samahang masa at mga organo ng demokratikong kapangyarihang pampulitika di na lamang sa antasbaryo o kulumpon ng mga baryo, kundi hanggang munisipyo, distri-

 <p>Taon XLI Blg. 18 Setyembre 21, 2010</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p>www.philippinerevolution.net</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa:</p> <p>angbayan@yahoo.com</p>	
<p>Nilalaman</p>	
<p>Editorial</p>	
Pakilusin ang milyun-milyong mamamayan	1
Panukalang badyet, diin sa limos	3
<p>Pananalanta ng pasistang estado</p>	
3 magsasaka, pinaslang ng militar	4
Mga sundalo, pinalayas sa Surigao	6
Paglabag sa karapatang-bata sa ICR	7
Paglabag sa mga karapatang-manggagawa	7
Abadilla 5	7
Huwad na "pangayaw" sa Paquibato	8
Balita	9
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	

to at prubinsya pataas. Pag-ugnayin ang mga organisasyon at kilusang masang ito sa pamamagitan ng masasaklaw na organisasyon at alyansa.

Tiyakin at bigyang-diin ang pagpapalitaw at pagpapaunlad ng ilampung libong aktibistang masa. Sila ang mamumuno sa mga saklaw nilang organisasyon at kilusang masa at magpapalawak ng mga ito. Sa kanayunan, sila ang pangunahing maaasahan sa pagpapalawak ng mga rebolusyonaryong organisasyong masa sa mga kanugnog na baryo at bayan. Sila ang malalim na balon para ibayong palawakin at palakasin ang Partido at BHB.

Palakasin at palawakin ang gawaing alyansa sa iba't ibang antas at saklaw. Palaganapin ang National Democratic Front at mga alyadong organisasyon nito sa lahat ng sektor at lugar. Buuin ang malapad na nagkakaisang prente ng mamamayang inaapi at pinagsasamantalahan, hatiin ang hanay ng mga kalaban, ihiwalay at konsentrahan ang paglaban sa kasalukuyang pinakamasahol na reaksyunaryo sa anyo ng naghaharing punong papet ng reaksyunaryong estado.

Palawakin at tuluy-tuloy na patatagin ang Partido. Masigasig na itayo ito sa hukbong bayan at mga organisasyong masa, mga alyansa, mga baryo at komunidad, paaralan, pabrika at mga tanggapan. Tiyakin ang pagpapalaganap ng Marxista-Leninista-Maoistang edukasyon at pag-sasanay sa mga kadre nito sa iba't ibang gawain at saklaw, at sa lahat ng antas.

Pursigidong isulong ang digmang bayan sa mas mataas na antas. Todo-larga nating isulong ang pakikidigmang gerilya tungo sa pag-abot sa yugto ng estratehikong pagkapatas ng digmang bayan sa mga darating na taon. **AB**

Bagong panukalang badyet: Diin sa paglilimos

Tinawag ng rehimeng US-Aquino na “badyet para sa repormang panlipunan” ang binalangkas nitong panukalang badyet ng gubyrerno para sa 2011. Ngunit taliwas dito, makikitang walang seryoso at matinong programa laban sa kahirapan at para sa pagpapaunlad ng kabuhatan at mga benepisyong panlipunan ang rehimeng US-Aquino. Ipinagpapatuloy lamang ang pagbibigay-prayoridad sa pagbabayad-utang at pagpapalakas ng militar. Sa kabila ng labis na pangangailangan, signipikante ang mga ibinawas sa badyet para sa agrikultura, reporma sa lupa, edukasyon, kalusugan at iba't ibang mga serbisyong panlipunan. *(Tingnan ang kaugnay na artikulo sa nakaraang isyu.)*

Ang pangunahing ipinagmamalaki ni Aquino ay ang 123% dagdag sa badyet ng Department of Social Welfare and Development (DSWD) na umabot sa P34.4 bilyon. Ang P29.2 bilyon o halos 85% nito ay inilaan sa Programang Pantawid Pamilyang Pilipino (4Ps), isang programang paglilimos na itinutalak ng gubyrernong US at mga imperyalistang ahensya. Susuportahan din ang programang ito ng pondong inutang sa Asian Development Bank (\$400 milyon) at pondong laan ng Millennium Development Corporation ng US (\$434 milyon).

Ang 4Ps ang pinalalabas na patunay ng pagiging “para sa repormang panlipunan” ng panukalang badyet ng rehimeng US-Aquino.

Kalakhan nito ay nakatuon sa pangangalaga sa kalusugan ng mga buntis at mga sanggol nila at sa pagtitiyak na pumapasok sa paaralan ang mga anak nila. Maglalaan umano ito bawat buwan ng hanggang P1,400 bawat pamilya (tig-P500 para sa medikasyon ng bawat buntis na ina at mga sanggol at tig-P300 bawat

anak na estudyante hanggang maksimum na tatlo) para sa tutukuyin ng DSWD na pinakamahirap na pamilya (na mula isang milyon ay tinatayang aabot sa 2.3 milyon sa katapusan ng 2011).

Kung tutuusin, malaking insulto sa mga hirap na hirap nang mamamayan ang limos na iniaalok ng gubyrernong Aquino. Una sa lahat, kulang na kulang ang sinasabing ilalaan sa bawat pamilya. Ikalawa, ang paglalaan ng pondong ito sa 4Ps ay gagawin kasabay ng pagbawas sa badyet para sa mga serbisyong pangkalusugan at edukasyon na magresulta sa lalo pang pagbagsak ng kapasidad ng mga lokal na ospital at *health center* at ng mga pampublikong paaralan.

Tinanggal din ang badyet ng National Food Authority na ginagamit para subsidyuhan ang produksyon ng mga magsasaka at pangkontrol sa presyo ng bigas sa pamilihan.

Ang 4Ps ay lokal na bersyon ng Conditional Cash Transfer (CCT), isang pakulo ng imperyalismong US at ng mga pandaigdigang ahensyang pampinansya



nito, tulad ng World Bank, na sinimulan sa ilang mahihirap na bayan noong huling bahagi ng dekada 1990. Ineengganyo ito ngayon ng Millennium Development Corporation bilang kundisyon sa dagdag na pagpapautang nito ng tulong pampinansya sa mga papet na estado. Sinasabing ang pamumudmod ng pera sa mga wala o walang sapat na hanapbuhay at lubhang naghihirap ay makatutulong sa pagpapasikad ng lokal na pamilihan.

Ngunit nasa likod ng pagbibigay ng ganitong mga palimos sa mahihirap na bansa para umano sa pinakamahihirap na mamamayan ang ang panatiliin silang mapagsu-mamo at palaasa sa ayudang panlabas ng gayong mga bansa, upang hindi na sila kumawala sa gapos ng imperyalismo at magpapaunlad pa ng sariling industriya at agrikultura. Itinatali rin ito ng gubyernong US sa mga kundisyon para sa higit pa nilang panghihimasok sa ekonomya, pulitika at militar.

Sa tulak ng US, inumpisahan ang 4Ps sa ilalim ng rehimeng Ar-

royo sa halagang P10 bilyon noong 2008. Wala mang katotohanan, ipinagmayabang ng rehimeng Arroyo na nakatulong daw ito sa pag-ahon sa kahirapan ng isang milyong Pilipino bago matapos ang termino nito. Ipinamamarali naman ni DSWD Secretary Corazon "Dinky" Soliman na sa pamamagitan ng 4Ps, sa loob ng susunod na limang taon ay maaasahang mababawasan nang hanggang kalahati ang karalitaan, mapauunlad ang kalusugan ng mga ina at anak nila at matitiyak na lahat ng mga kabataan ay makapag-aaral.

Ngunit ang totoo'y patuloy na lumalala ang karalitaan at dumarami ang mahihirap at nagugutom na mamamayan. Walang tunay at pangmatagalang naitutulong ang ganitong mga ayuda sa mamamayang naghihirap. Sa katunayan, malaking bahagi ng pondong nailaan sa 4Ps ay nilamon lamang ng korapsyon. Higit sa anupaman, ang sigaw ng masang anakpawis ay lupa, trabaho at sapat na sahod, hindi nakaiinsultong limos.

Pinagtatakpan lamang ng 4Ps ang pagtanggig ng reaksyunaryong estado na isagawa ang mga kinakailangang hakbangin upang isulong ang pagpapaunlad ng pambansang industriya at nakatatayosa-sariling ekonomya. Wala itong balak itaas ang kulang na kulang na minimum na sahod ng mga manggagawa na wala pa sa sangkapat ng kinakailangang minimum para mabuhay nang disente ang kanilang mga pamilya. Wala rin itong balak na lutasin ang matagal nang problema sa lupa na siyang pangu-nahing sanhi ng kahirapan ng mga magsasaka. Asahang lalo pang lalala ang kahirapan sa ilalim ng rehimeng US-Aquino.

Wala itong inihahaing tunay na kalutasan sa mga problema ng kahirapan bunga ng pagkaatrasado ng ekonomya, kawalan ng pambansang industriya, kawalan ng tunay na reporma sa lupa, malawakang disempleyo, mababang sahod at walang tigil na pagpaimbulog sa presyo ng mga bilinghin at singil sa mga serbisyo. **AB**

Tatlong magsasaka, pinaslang ng militar

Walang humpay ang pananalasa ng militar sa kanayunan. Tatlong magsasaka ang pinaslang ng mga sundalo sa magkakahiwalay na pangyayari sa Camarines Sur, Davao City at Compostela Valley nitong unang hati ng Setyembre. Sa Albay, isang konsehal ng barangay ang tinortyur ng mga berdugong militar. Samantala, isang dating Pulang mandirigma ang inaresto ng AFP sa Compostela Valley at pinalalabas na lider ng Bagong Hukbong Bayan (BHB).

Setyembre 12. Isang sibilyan ang napatay at apat na iba pa ang nasugatan nang paulanan ng bala ng mga elemento ng 9th ID ang bahay ng isang pamilya sa Camarines Sur. Ayon kay Ka Greg Bañares, tagapagsalita ng National Democratic Front-Bicol, napatay sa pamamari-

ang magsasakang si Roderick Ballebar, binata, habang nasugatan sina Francisco Bergado (may tama sa braso), asawa niyang si Amelita (may tama sa kamay at paa) at mga anak na dalagang sina Rose (may tama sa siko) at Margio (may tama sa li-

kod). Ang madugong insidente ay nangyari sa Sityo Culpa, Barangay Lubgan sa bayan ng Bula.

Setyembre 9. Pinatay ng mga sundalo ang sibilyang si Vicente Felisilda sa Barangay Malinawon, Mawab matapos siya makatanggap ng sunud-sunod na pagbabanta mula sa militar dahil sa pagsuporta niya umano sa BHB.

Setyembre 8. Dinukot at idinetine nang dalawang araw ng mga elemento ng militar si Elke Bacalso, 20 taong gulang. Si Bacalso ay anak ni Julian Bacalso, dating detenidong pulitikal at *coordinator* ng Samahan ng mga Ex-Detainee Laban sa Detensyon at para sa Amnestiya (SELDA). Mag-aaral





siya ng Cebu Institute of Technology (CIT) sa Cebu City.

Dinukot siya habang nasa labas ng kanilang eskwelahan dakong alas-4 ng hapon. Bigla siyang pini- ringan ng dalawang lalaki at isina- kay sa isang *van*. Dinala siya sa iba't ibang *safehouse* kung saan pi- lit siyang pinaamin sa gawain ng kanyang ama sa organisasyon. Iniwan na lamang siya ng mga du- mukot sa kanya noong Setyembre 10 sa bayan ng Santander. Bago ang pagdukot sa kanya, nakita ni Bacalso noong Agosto 23 na may sumusunod sa kanya na dalawang lalaki. Tinangka siyang dukutin no- ong Setyembre 3. Noong eleksiyong pampanguluhan, si Bacalso ay na- ging boluntir ng Kabataan Partylist sa Cebu City.

Setyembre 6. Inaresto ng mga tauhan ng 10th ID ang isang da- ting myembro ng BHB na lumabas sa kilusan noon pang 2006 at ipin- resenta sa midya bilang lider ng BHB na mataas ang katungkulan. Pinalalabas ng 10th ID na si Perci- val Manimog ay dinakip sa isang operasyong militar sa Monkayo, Compostela Valley. Mariing kinun- dena ng Magtanggol Roque Com- mand ng BHB ang naturang pagda- kip bilang desperadong hakbang ng militar sa harap ng patuloy na di- naranas nitong matitinding dagok mula sa BHB. Pinabulaanan ng BHB ang mga kasinungalingan ng taga- pagsalita ng 10th ID na si Lt. Col. Medel Aguilar na si Manimog ay isang lider ng BHB.

Setyembre 5. Tinortyur ng sampung armado at di uni- pormadong lalaki si Warren Morilla, isang konsehal ng barangay. Namamahinga siya sa kanyang bahay sa Baran- gay Florista, Libon, Albay nang biglang dumating ang mga salarin. Ipinatuturo sa kanya ang mga ba-

hay umano ng mga rebelde sa lu- gar. Nang sabihin niyang wala si- yang nalalaman sa mga itinatantong sa kanya, tinutukan siya ng baril at kinaladkad palabas ng bahay. Si- nakluban ng plastik ang kanyang ulo at siya'y kinulata. Bago umalis ang mga salarin, pinapirma si Mo- rilla sa isang papel na nagsasaad na wala silang sinaktan at wala si- lang kinuha sa kanyang pamama- hay. Sa katunayan, tinangay ng mga salarin ang kanyang pitakang may lamang ₱360.00, dalawang gulok at pati ang kanyang tsinelas.

Setyembre 3. Pinatay ng mili- tar sa harap ng kanyang pamilya ang magsasakang si Reynaldo La- brador. Si Labrador, residente ng Sityo Narra, Barangay Paquibato Proper sa Davao City ay myembro ng Paquibato District Farmers' As- sociation (Padifa) at Farmers As- sociation in Davao City. Ang mga salarin ay mga sundalo ng 69th IB at isang pwersang paramilitar na nakilalang si Roberto "Kulot" Repe.

Agosto-Setyembre. Sinenten- syahan ng korte noong Agosto 12 ng mahigit dalawang taong pagka- bilanggo ang tatlong lider ng un- yon sa Energy Development Corp. (EDC) o ang dating Philippine Na- tional Oil Corporation (PNOC) sa gawa-gawang kasong isinampa ng kumpanya na *grave coercion* at *ma- licious mischief*. Ito ay dahil umano sa pagkakabasag ng *signal light* ng sasakyan ng kumpanya na nagkaka- halaga ng ₱1,400.00 nang salaka-


yin ang kanilang piketlayn noong Oktubre 2000. Isa sa tatlong naha- tulan ay si Dante Senillo, bise pre- sidente ng Leyte-A Geothermal Pro- ject Employees Union na lumalaban sa iba't ibang *unfair labor practices* ng PNOC.

Mahigit 100 manggagawa ng dating PNOC ang nagwelga at nag- tayo ng piketlayn. Ilang araw la- mang tumagal ang kanilang piket dahil marahas itong binuwag ng mga pulis at militar. Pinaulanan ng mga bala ang piketlayn kaya nag- pulasan ng takbo ang mga welgista na ang iba ay tumalon sa bangin para lang makaiwas sa karahasan ng mga pulis at militar. Ang mga naabutan ay pinagbubugbog kaya marami ang nasugatan. Isa sa mga biktima nito ay namatay kamakai- lan lamang dahil nagkakanser sa baywang sanhi ng matinding palo ng baril noon sa piketlayn.

Nabili na ng pamilyang Lopez ang EDC at sila ngayon ang nagtu- tulak ng kaso laban sa mga mang- gagawa bilang pangontra sa pagsa- sampa ng unyon sa Korte Suprema ng petisyon para muling pag-aralan ang kanilang kaso.

Samantala, mahigit na ring tat- long taong nakakulong sa Leyte Provincial Jail si Vincent "Bebot" Borja na siyang lider ng nasabing unyon at kasapi ng KMU National Council. Ikinulong siya bunsod ng gawa-gawang kasong rebelyon at pagpatay na isinampa laban sa kanya. Wala man lamang ginawang pagdinig sa kaso niya sa loob ng unang dalawang taon. Nito namang pangatlong taon ay lagi namang ipinagpapaliban ang is- kedyul ng pagdinig.

Ayon sa KMU, sadyang pinatata- gal ng gubyerno ang paglilitis para tuma- gal si Borja sa piitan. **AB**





Mga sundalo, pinalayas ng mga Lumad sa Surigao del Sur

Matagumpay na napalayas ng mga nagprotestang Lumad ang mga sundalo ng AFP na nag-ooperasyon sa kanilang mga komunidad sa Marihatag, Surigao del Sur. Nakabalik na sa kanilang barangay ang mahigit 230 pamilyang Lumad o 1,125 indibidwal matapos ang ilang araw na pagbakwit at pagkampo sa Marihatag Municipal Gym.

Sa harap ng matinding presyur, lumagda ang mga upisyal ng 36th IB kasama ang pamunuan ng barangay sa isang kasunduang aalisin na ang kanilang tropa. Saksi sa nasabing kasunduan ang mga taong simbahan, upisyal ng lokal na pamahalaan at iba pang mga grupo.

Nagpahayag ang grupong Karapatan na patuloy itong magbibigay ng tulong sa mga residente at magbabantay kung lalabag muli ang mga sundalo sa kasunduan. Nana-wagan ito kay Benigno Aquino III na itigil na ang mga operasyong militar sa lugar at huwag idamay ang mga sibilyan dito.

Noong Marso pa lamang ay nagkampo na sa paligid ng barangay ang mga sundalo at sinisindak na nila ang mga residente. Sinarbey nila ang mga tao, nagpalabas ng mga pelikulang naninira sa rebolusyonaryong kilusan at nagpatawag ng mga pulong kung saan direktang nilang inaakusahan ang mga residente na tagasuporta ng Bagong Hukbong Bayan (BHB). Sinabi rin nilang magbibigay sila ng pabuyang P500.00 sa sinumang makapagtuturo sa kampo ng mga rebelde. Namigay din sila ng kendi sa mga bata bilang suhol.

Walang habas ang mga pagla-

bag sa karapatang-tao, kabilang na ang pananakot sa isang babae dahil sa paratang na ang kanyang anak ay myembro umano ng BHB. Binomba rin ang komunidad dahil sa kabiguan ng mga nag-ooperasyong sundalo na makita ang BHB at binantaan ang buong barangay na imamasaker silang lahat kapag hindi nila ituturo ang kinalalagyan ng mga gerilya.

Nagsimulang lumikas noong Agosto 20 ang mga sibilyan tungong munisipyo ng Marihatag. Bumalik sila matapos makipagdayalogo at mapapayag ng lokal na pamahalaang bayan ang mga sundalo


na umatras na sa nasabing barangay.

Subalit isa na namang kaso ng paglabag sa karapatang-tao ang nagbunsod ng panibagong ebakwasyon. Ginapos, kinaladkad at binugbog ng mga sundalo ng 36th IB ang pitong residente, kabilang ang isang 14-taong gulang na batang lalaki. Pilit silang pinaaamin na mga tagasuporta sila ng BHB. Ihiniwalay ang bata at inalok ng P20,000.00 kung ituturo niya ang kinalalagyan umano ng mga armas ng BHB. Tinakot din siya na kung hindi siya magbibigay ng impormasyon ay ililibing siya nang buhay o ihuhulog mula sa lumilipad na helikopter.

Nagtangka ang mga residenteng humingi ng tulong sa pamahalaang pamprubinsya ng Surigao del Sur subalit hinarang at hinaras ng mga upisyal ng 36th IB at pulisya ang komboy nilang pupunta sana sa kapitolyo. Napilitan silang bumalik dahil sa matinding takot. Sa *evacuation center* naman ay dumami ang nagkasakit na mga bata. Nagkulang na rin sa suplay ng pagkain, gamot at gamit sa sanitasyon. Dahil dito, idineklara ng Municipal Disaster Coordinating Council ng Marihatag ang *state of calamity* sa nasabing lugar.

Matatandaang noong 2009, umabot sa 3,000 mamamayan ang sapilitang lumikas mula sa kalapit na bayan ng Lianga dahil sa sunud-sunod na operasyong militar laban sa BHB.

Mula nang magsimula ang pananalasa ng militar sa pamumuno nina Lt. Col. Rene Cañete at 1Lt. Serihim Temperante, dalawang sundalo na ang napatay at tatlo ang nasugatan sa pakikipagsagupa sa BHB. AB



Paglabag sa karapatang-tao ng mga bata sa Ilocos-Cordillera

Ang mga bata ay kabilang sa mga pinakakawawang biktima ng mga paglabag sa karapatang-tao sa Ilocos-Cordillera Region (ICR).

Ayon sa Children's Rehabilitation Center sa ICR (CRC-ICR), pinakamatingkad na paglapastangan sa karapatan ng mga bata sa rehiyon ang paggamit ng militar sa kanilang mga paaralan para gawing detatsment. Mayroong naitalang 134 na kaso nito mula 2005 hanggang 2010.

Mula 2007 hanggang 2009 ay mahigit 15 eskwelahan naman ang ginamit ng militar sa pagdaraos ng mga pulong-masa para pilit iugnay ang mga ligal na demokratikong organisasyon tulad ng partidong Anakpawis sa armadong rebolusyonaryong kilusan.

Sa gayon ding panahon ay na-

kapagtala ang CRC-ICR ng isang batang biktima ng ekstrahudisyal na pagpaslang; 25 batang biktima ng pambobomba ng mga eroplano at helikopter; 17 batang biktima ng pananakot at harasment; 16 na batang biktima ng sapilitang pagre-rekrut sa CAFGU; 14 na naulila dahil sa ekstrahudisyal na pagpaslang sa kanilang mga magulang; at siyam na nawalan ng mag-aaruga dahil sa pagkakaaresto at detensyon ng kanilang mga magulang.

Dalawang bata rin ang pilit na pinalabas na mga sumukong gerilya ng Bagong Hukbong Bayan. **AB**

Paglapastangan sa mga karapatang-manggagawa

Nag-iwan ng mapait na pamana sa uring manggagawa ang rehimen ni Gloria Arroyo. Sa huling anim na buwan ng panunungkulan nito, matingkad ang mga naging paglabag sa karapatang-tao ng mga manggagawa.

Ayon sa Center for Trade Union and Human Rights (CTUHR), nagkaroon ng 102 kaso ng paglabag sa karapatang-tao sa hanay ng mga manggagawa. Apatnapu't anim (46) dito ay paglabag sa kanilang mga karapatang sibil at pampulitika at 56 ang paglabag sa kanilang karapatang pang-ekonomya, sosyal at kultural. Kabilang din dito ang 40 kaso ng paglabag sa karapatang mag-union at kolektibong pakikipagtawaran.

Ang mga kasong ito ay bumiktima ng 19,696 indibidwal—19,595 sa loob ng mga pabrika at 239 ang nabiktima sa gitna ng kanilang paggampan ng kanilang mga karapatan sa pag-uunyon.

Tumaas ang bilang ng mga kaso ng karahasan laban sa mga manggagawa. Kumpara sa 27 noong 2009, umabot ito sa 46 ngayong unang hati ng 2010 o katumbas ng 70.3% na pagtaas. Pinakamatingkad sa mga kaso ng karahasan ang dalawang kaso ng pagpaslang sa mga manggagawa na bumiktima kina Edward Panganiban, kalihim ng unyon sa Taketa Philippines, Inc. na pinagbabaril noong Hunyo 2 pinagbabaril sa Sta. Rosa, Laguna; at Benjamin Bayles, organisador ng National Federation of Sugar Workers na pinatay sa Himamaylan, Negros Occidental noong Hunyo 14. **AB**

Hatol sa Abadilla 5, inuulan ng batikos

Kinatigan ng Korte Suprema nitong Setyembre 7 ang desisyon ng Court of Appeals noong 2008 na nagpapataw ng habambuhay na pagkakakulong sa tinaguriang "Abadilla 5"—ang limang inakusahang pumatay sa pasistang si Col. Rolando Abadilla noong 1996. Ang limang hinatulan ay sina Joel de Jesus, Lenido Lumanog, Rameses de Jesus, Cesar Fortuna at Augusto Santos.

Ang hatol ng Korte Suprema ay inuulan ngayon ng pagkundena mula sa mga nagtataguyod ng karapatang-tao. Kabilang sa mga tinutukoy na depekto ng pasya ng Korte ang sumusunod:

> Binalewala ng Korte Suprema ang katotohanang inaresto ang mga akusado nang walang kaukulang mandamyento. Wala rin silang abugado.

> Hindi pinansin ng korte na ang umano'y pagamin ng mga akusado ay nakuha matapos silang tortyurin ng mga pulis na humuli sa kanila.

> Ang tanging tuntungan ng hatol ay ang kwestyunableng testimonya ng nag-iisang saksi. Unang kinilala ng saksi si Joel de Jesus matapos siyang pakitaan ng litrato nito anim na araw matapos ang pagpatay kay Abadilla. Ang iba pang akusado ay kinilala lamang ng testigo nang maiharap na sila sa midya. Hindi binigyang-halaga ng hukuman ang pag-ako ng bandidong Alex Boncayao Brigade (ABB) at ang kawalang-kaugnayan sa ABB ng mga hinatulan. **AB**

Huwad na pangayaw sa Paquibato, sulsol ng AFP

Isang huwad na "pangayaw" o gera ng mga tribo ang inudyok at ginagamit ngayon ng 1003rd Brigade ng AFP upang mang-upat ng kaguluhan at takot sa mga komunidad ng Ata-Manobo at settler sa Paquibato District, Davao City sa layuning mapalayas sila sa kanilang lupa.

Ang mga pasimuno ng "pangayaw" na ito ay sina Ruben Labawan, isang pekeng lider-Lumad na sa katunaya'y lihim na ahente ng militar. Si Labawan ang tagapangulo ng Supreme Tribal Council for Peace and Development, isang grupong binuo ng AFP. Sinulsulan siya ni Brig. Gen. Eduardo del Rosario, hepe ng 1003rd Bde, para ideklara ang "pangayaw".

Isinasangkalan ngayon ang "pangayaw" para patayin ang mga Ata-Manobo at settler na pinaghihinalaang sumusuporta sa Bagong Hukbong Bayan (BHB).

Ayon sa mga dokumentong nakumpiska kay Labawan, siya at ang kanyang mga tauhan ay binigyan ng 1003rd Bde ng mga ripleng Garand at M14, mga radyong pangkomunikasyon at iba pang kagamitang militar.

Isa ring iskward ng mga mamamatay-tao ang pinopondohan ng 1003rd Bde. Kinabibilangan ito ng 14 na berdugong Lumad na pinili mismo ni Labawan. Inisyuhan din sila ng mga gamit-militar.


Binuo rin nina Labawan ang Bagani Long Range Platoons, isang 168-kataong pwersang paramilitar na nahahati sa 12 platun mula sa 12 sityo at barangay ng Paquibato District.

Ang mga pwersang ito ang tinaguriang "Alsa Lumad" o mga Lumad na lumalaban umano sa BHB. Sila ay inorganisa at pino-

pondohan ng AFP para labanan ang rebolusyon at wasakin ang pagkakaisa ng mga Lumad para mas madali silang magapi sa harap ng pananalasa ng mga higanteng agrokorporasyon sa kanilang mga lupang ninuno.

Sunud-sunod nang mga paglabag sa karapatang-tao ang isinasagawa ng mga pwersa ni Labawan. Iniutos ni Labawan na tuwing may mapapatay na sundalo, elemento ng CAFGU o myembro ng Alsa Lumad sa pakikipaglaban sa BHB, ang mga sibilyang komunidad kung saan naganap ang labanan ay dapat magbayad ng danyos sa anyo ng mga hayop na pansaka at salapi. Kapag hindi ito nagawa ng mga sibilyan, isang "pangayaw" ang idineklara laban sa kanila. Sa mga "kampanyang edukasyon at impormasyon" nito sa Paquibato ay sinulsulan din ng 1003rd Brigade ang mga Lumad na mag-alsa laban sa BHB sa gayon ding dahilan.

Ang kasalukuyang "pangayaw" ni Labawan ay idineklara niya matapos mapatay noong Agosto 6 ang kanyang kapatid at badigard na si PFC Kimpio Labawan ng 103rd Division Reconnaissance Company nang manlaban ito sa mga Pulang mandirigmang humarang sa kanila sa isang tsekpoynt sa Sityo Marugasan, Barangay Colosas, Paquibato District.



Ang "pangayaw" ni Labawan ang dahilan ng pagkakapaslang noong Agosto 12 ng magsasakang si Julius Tamondes. Si Tamondes ay pinatay sa kanyang bukirin sa Colosas.

Bukod kay Tamondes, tinangka ring patayin noong araw na iyon ang isa pang magsasaka, si Angelino Gentorales subalit siya ay nakatakas. Matapos ito ay nadaplisan din ang sibilyang si Dodo Cabatuan.

Dahil sa takot na nililikha ng naturang "pangayaw," nagsilikas na ang mga magsasaka papuntang sentro ng bayan. Nais ng 1003rd Bde na permanente nang lumikas ang mga Lumad at settler para mai-alok nila ang mga nakatiwangwang na bukirin sa mga plantasyon ng saging na patuloy na nagpapalawak sa maraming lugar sa Southern Mindanao.

Matagal nang gumagamit ang AFP ng mga huwad na programa para hatiin ang mga Lumad at ihiwalay sila sa rebolusyonaryong kilusan. Noong unang bahagi ng 2000, binuo ng militar ang Alamar bilang bahagi ng kontra-rebolusyonaryong kampanya nito sa hanay ng mga Lumad.

Ginamit ng militar ang mga niloko nitong Ata-Manobo at Matigsalog upang mandahas sa mga komunidad ng Paquibato District at kanugnog na mga lugar. May mga residente at kasama na napatay dulot ng kaguluhan.

Gayunpaman, napigilan ng mga kasama ang panloloko ng AFP sa pamamagitan ng pagpapatupad ng kampanyang rekoberi at edukasyon sa hanay ng mga Lumad. Nagkaroon ng *tampuda* (tradisyunal na kasunduang pangkapayapaan) sa hanay ng mga datu at mga masang nagpasimuno ng Alamara. Di nagtagal, bumalik ang mainit na samahan sa pagitan ng mga kasama at ilang pansamantalang nalinlang at naihiwalay sa hanay ng mga Lumad. AB

Mga bilanggong pulitikal, naglunsad ng *hunger strike*

SABAY-SABAY na naglunsad ng *hunger strike* ang 148 bilanggong pulitikal sa buong bansa noong Setyembre 17 para igiit ang kanilang agarang paglaya sa administrasyon ni Benigno Aquino III na nagsasabing may pagrespeto umano sa karapatang-tao.

Ang “Morong 43,” mga manggagawang pangkalusugan na hinuli sa Morong, Rizal noong Pebrero, ang nanguna sa pagdaraos ng ayuno sa National Capital Region at sa iba pang mga bilangguan tulad ng New Bilibid Prison, Camp Crame, Camp Karingal, Correctional Institute for Women at sa Camp Bagong Diwa sa

Bicutan; Isabela; Tuguegarao City; Ifugao; Bohol; Cebu City; Danao City; Bacolod City; Tacloban City; Leyte Provincial Jail; Compostela Valley; Bukidnon; at Cagayan de Oro City. Kaugnay nito, nagdaos ng isang misa si Bishop Deogracias Iñiguez sa St. Peter the Apostle Parish sa Quezon City.

Ang protestang pag-aayuno ay nilahukan ng mga kamag-anak at tagasuporta ng “Morong 43” na nagtirik ng tolda sa Quezon Avenue sa harapan ng monumento ni Ninoy Aquino. Ilan sa mga personalidad na sumama rito ay sina Sen. Loren Legarda, Commissioner Jose Ma-mauag ng Commission on Human Rights, dating Gabriela Rep. Liza Maza, Bayan Muna Rep. Teodoro “Teddy” Casino at ACT Teachers Rep. Antonio Tinio. Nagkaroon din ng seremonya sa Canada at nagpadala ng mga mensahe mula sa New Zealand at Germany.

Chevron at Shell, libre sa buwis

INILAHAD ng Commission on Audit (COA) na mahigit P53 bilyong buwis ang hindi natanggap ng guberno mula sa kita ng mga pribadong opereytor ng Malampaya Gas Project noong 2003-2009. Ang Shell at Chevron, dalawang myembro ng pandaigdigang kartel sa petrolyo ang tinutukoy na mga pribadong opereytor ng proyekto.

Ayon sa kasunduan ng guberno sa Shell at Chevron, dapat mapunta sa guberno ang 60% ng kita sa pagbebenta ng natural na gas. Bukod dito ay dapat nagbabayad pa rin ang mga pribadong opereytor ng Malampaya ng kaukulang buwis sa 40% na bahagi nila sa kita.

Noon lamang 2004 nagbayad ang Shell at Chevron ng buwis mula sa 40% na bahagi nila sa kita mula sa proyekto, pero itinigil ito nang pumasisyon ang Department of Energy (DOE) na ang buwis ng mga pribadong opereytor sa proyekto ay kasama na sa 60% bahagi ng guberno sa kita ng proyekto.

Sa pagrepaso ng COA nito lamang Marso, inilina nito na magkaiba pa ang 60% na bahagi ng guberno sa kita ng proyekto at ang buwis sa ganansya ng mga pribadong opereytor mula sa 40% na bahagi nila sa kita ng proyekto.

Ang Malampaya Gas Project na nagkakahalaga ng \$4.5 bilyon ay

isa sa pinakamalalaking proyekto sa pagmimina ng mga natural na yaman sa bansa. Nagmimina ito ng natural na gas mula sa karagatan ng Palawan na pinoproseso sa isang planta sa Batangas bago ipamahagi sa tatlong istasyong naglulawal ng kuryente.

Malaon nang tinututulan ng mamamayan ang proyekto. Nagbibigay ito sa mga higitang dayuhang kumpanya sa langis ng pagkakataon para makapandambong at kumita ng supertubo sa likas na yaman ng bansa. Sa kalagayang halos lubos na umaasa ang bansa sa inaangkat na langis mula sa pandaigdigang kartel sa petrolyo, malaking bagay kung nakapagsasarili ang bansa sa pagmimina ng gas sa Malampaya at mga katulad nito. Malaki rin sana ang nababawas sa patuloy na tumaas na singil sa kuryente, kung buong-buong tinatamasa ng bansa at mamamayan ang kita mula sa naminang gas sa proyekto.

Kabataan, nagprotesta laban sa pagtataas ng pasahe sa MRT-LRT

NAGPROTESTA ang mga kasapi ng Anakbayan sa istasyon ng Metro Rail Transit (MRT) noong Setyembre 10 para tutulan ang pagtataas ng pasahe ng MRT at Light Rail Transit (LRT). Kaugnay nito, nagpapirma sila sa mga pasahero para makakalap ng isang milyong lagda laban sa pagtataas ng pasahe sa MRT-LRT.

Dahil sa aktibong paglaban ng mga estudyante sa nakaambang pagtataas ng pasahe, napilitang magpahayag ang administrasyong Aquino na pinag-aaralan nito ang pagbibigay ng diskwento sa pasahe sa MRT at LRT para sa mga estudyante.

Ang pagtataas ng pasahe ay isasagawa ng rehimeng Aquino upang maitigil nito ang subsidyo para sa serbisyo sa tren. Ginawang dahilan ng rehimen ang pagtutuon ng pondo ng bayan para umano sa edukasyon at hanapbuhay at upang ibsan ang kagutuman ng mamamayan.

Muling maglulunsad ng kilos-protesta sa Setyembre 24.

Kakarampot na dagdag-sahod, tinuligsa

ISANG programa sa harap mismo ng Department of Labor and Employment sa Maynila ang inilunsad ng Kilusang Mayo Uno noong Setyembre 8 upang tuligsain ang pag-apruba ni Pres. Benigno Aquino III sa kakarampot na dagdag-sahod ng mga manggagawa sa iba't ibang rehiyon. Anang KMU, isang napakalaking insulto sa mga manggagawa ang napakaliit na dagdag sa kanilang kulang na kulang na sahod.

Ang mga inaprubahang dagdag sa minimum na arawang sahod ay P22 sa NCR, P15 sa Region VI, P18 sa Region VII, P12 COLA *integration* at P13 sa Region X, P21 sa Region XI, P10 COLA *integration* at P10 sa Region XIII at P12 sa ARMM.

Naging P404 ang minimum na arawang sahod sa NCR, pero ang kinakailangan para disentang mabuhay ang isang karaniwang laking anim-kataong pamilya ay mahigit apat na ulit nang mas malaki rito.

Iskandalong *jueteng*, muling sumabog

KASASABI pa lamang ni Pres. Benigno Aquino na hindi niya prayoridad ang pagsugpo sa *jueteng*, ang kanyang gubyernong nagpapanggap na malinis ay niyayanig ngayon ng malaking iskandalo sa pagkakasangkot ng matataas na upisyal nito sa naturang iligal na sugal.

Dalawang pinagkakatiwalaang tauhan ni Aquino ang isiniwalat ni retiradong Archbishop Oscar Cruz na tumatanggap umano ng P2 milyon hanggang P5 milyon kada buwan mula sa mga "*jueteng lord*".

Isa rito si Usec. Rico Puno ng Department of the Interior and Local Government na umamin nang marami ang lumalapit sa kanya tungkol sa *jueteng* pero hindi umano niya ito pinaunlakan. Sa isang inilabas na dokumento ng mga nakabababang upisyal ng PNP, nalantad naman ang bagong hirang na hepe ng Philippine National Police (PNP) na si Raul Bacalzo. Hindi bago ang akusasyon kay Bacalzo. Noong 2005, marami na ang nagtestigong sangkot siya sa iligal na sugal.

Sinabi ni Aquino na paiimbes-tigahan niya ang mga kasong ito.

Pero mas nananaig sa kanya ang kaagad na pag-abswelto sa mga sangkot na upisyal. Kaduda-duha umano ang sirkunstansya ng pagbubunyag nito. Maliliit din umano ang halagang nababanggit.

Ani Archbishop Cruz, mula tuktok hanggang pinakamababa ay lunod sa lagay mula sa *jueteng* ang pulisya sa buong bansa. Aniya, handa siyang pangalanan ang sampung iba pang upisyal ng gubyernong Aquino sa pagdinig sa Setyembre 21 na idaraos ng Senate Blue Ribbon Committee na pinamumunuan ni Sen. Teofisto Guingona III. Kanya ring pinaunlakan ang paanyaya ni Bayan Muna Rep. Teodoro Casiño, kasapi ng Committee on Good Government and Public Accountability, na magdaraos din ng pagdinig tungkol sa bagong iskandalo sa *jueteng*.

Mahigit 2 milyong manggagawa, nagprotesta sa France

MAHIGIT dalawang milyong manggagawa ang nagmartsa sa iba't ibang syudad ng France noong Setyembre 7 upang labanan ang mga "reporma" sa pensyon na balak ipatupad ng gubyerno ni President Nicolas Sarkozy. Pinamunuan ang kilos-protesta ng Confederation Generale du Travail (CGT o General Confederation of Labor), ang pinakamalaking unyon sa France.

Naparalisa ng 24-oras na welga ang 50% ng serbisyo ng tren sa buong bansa at 25% ng mga byahe ng eroplano. Nagdulot din ito ng malawakang dislokasyon sa sistema ng koreo.

Tinutulan ng mga manggagawa ang balak ng gubyerno na itaas sa 62 taon sa minimum ang edad sa kanilang pagreretiro. Matigas sa papisyong ito ang gubyerno ng

France at nagbababala pang maaaring itaas sa 67 taon ang edad sa pagreretiro, katulad ng ginawa sa Germany mula sa dating 65 taon. Sa karamihan ng bansa sa Europe, 65 taon na ang edad sa pagreretiro at binabalak na ng Great Britain at iba pang mga gubyerno sa Europe na itaas na rin ito sa 67.

Ang nagdaang welga ang pinakamalawak at pinakamalakas mula

nang simulan ng mga manggagawa noong Mayo ang kanilang pagtutol sa paghihigpit sa sinturon ng gubyerno. Pinagdedebatehan pa sa parlamento ang panukalang "reporma" sa pensyon.

Bukod sa welga sa France, naglunsad din ng mga kilos-protesta ang mga manggagawa sa United Kingdom. Naparalisa ang 60% ng mga tren sa syudad ng London bunga ng 24 oras na welga ng mga manggagawa noong Setyembre 7. Pinoprotesta ng mga welgista ang balak ng gubyerno ng syudad na sisantehin ang 800 manggagawa para makatipid.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 18
Setyembre 21, 2010
www.philippinerevolution.net

Editorial

Pakilusin ang milyun-milyong mamamayan para isulong ang rebolusyong Pilipino!


Napakapaborable ang mga umiiral na kundisyon para pukawin, organisahin at pakilusin ang milyun-milyong mamamayang Pilipino sa landas ng militanteng pakikibaka at rebolusyonaryong digma. Ang pagluluwal ng malawakang kilusang masa sa buong bansa ang susing rekisito para sa ibayong pagsulong ng digmang bayan tungo sa yugto ng estratehikong pagkapatas sa susunod na limang taon.

Patuloy na lumalala ang mga kundisyong panlipunan sa ilalim ng papet na rehimeng Aquino. Labis ang paghihirap at pagdurusa ng mamamayan sa harap ng malawakang disempleyo, napakababang sahod, matinding pang-aaping pyudal at malapyudal, pagtaas ng mga presyo at pamasahé, pabigat na mga buwis, lansakang korapsyon, kasalatan ng mga serbisyong panlipunan at iba pa.

Sa sidhi ng krisis, mabilis na nalalantad ang kahungkagan ng mga buladas ng rehimeng US-Aquino. Madaling naglaho ang pabalat-bungang maghahatid ito ng pagbabago. Wala pang 100 araw sa pwes-to si Aquino, laganap na ang pagkadismaya, maging sa bahagi ng maraming dating sumuporta o umasa sa kanya.

Itinutuloy lamang ng rehimeng US-Aquino ang mga imperyalistang patakaran sa ekonomya (laluna ang ibayo at mas malawakang denasyunalisasyon at pribatisasyon).

Tampok ang kaso ng Hacienda Luisita at ang tuluyang pagsasaisantabi ng reporma sa lupa. Litaw kaagad ang angilan ng mga paksyon, pagkainutil, korapsyon, at nitong pinakahuli, ang pagkakasangkot ng ilang susing upisyal sa *jueteng*. Patuloy nitong pinahihintulutan ang panghihimasok ng mga dayuhang tropa sa bansa. Patuloy ang mga paglabag sa karapatang-tao, terorismo at matitinding saywar sa pagpapalawig sa Oplan Bantay Laya at pagbubuo ng bagong plano para supilin ang mga paglaban ng mamamayan.



Mga tampok sa isyung ito...

Panukalang badyet:
Diin sa limos PAHINA 3

Tatlong magsasaka,
pinaslang PAHINA 5

Huwad na "pangayaw"
sa Paquibato PAHINA 8

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com